



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“ broj 95/12), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2014. GODINU I POSTIZBORNOG FINANSIJSKOG IZVJEŠTAJA-OPĆI IZBORU 2014.GODINE **SOCIJALDEMOKRATSKE PARTIJE BIH**

Broj: 03-07-6-301/15
Sarajevo, 15.07.2016. godine

S A D R Ź A J

MIŠLJENJE REVIZORA	3
1.UVOD.....	4
2. PREDSTAVLJANJE POLITIČKE STRANKE	4
3. OPIS REVIZIJE.....	5
Predmet revizije	5
Cilj revizije.....	5
Obim revizije	5
4. PRETHODNE KONTROLE I REVIZIJE.....	5
5. NALAZI I PREPORUKE	5
5.1. NALAZI.....	5
5.2. PREPORUKE	10

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) izvršila je reviziju finansijskih izvještaja Socijaldemokratske partije Bosne i Hercegovine za 2014. godinu i to: godišnjeg finansijskog izvještaja za 2014. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2014. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom godišnjeg finansijskog izvještaja za 2014. godinu, utvrđeno je da je Socijaldemokratska partija Bosne i Hercegovine prekršila odredbe člana 5. stav (4), člana 6. stav (2), člana 8. stav (4) i stav (5), člana 11. i člana 12. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Socijaldemokratska partija Bosne i Hercegovine u 2014. godini postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

1.UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Socijaldemokratske partije BiH za 2014. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Opštih izbora, održanih u oktobru 2014. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. stav (2) Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijaldemokratska partija BiH, finansirala se iz sljedećih izvora:

Red. br.	Vrsta prihoda	Iznos u KM	Učešće u uk. prih. %
1	Članarina	700.946,85	14,39%
2	Prilozi fizičkih lica (3-a)	168.680,50	3,46%
3	Prilozi pravnih lica (3-b)	352.608,33	7,24%
4	Prihodi od imovine (3-c)	642.381,03	13,19%
5	Prihodi od pr.lica (3-d)	0,00	0,00%
6	Prihodi od poklona (3-e)	0,00	0,00%
7	Prihodi iz budžeta (3-f)	2.982.209,50	61,22%
8	Prihodi od propagande (3-g)	0,00	0,00%
9	Ostali prihodi	24.799,00	0,51%
I	Ukupni prihodi	4.871.625,21	100,00%
II	Kreditno zaduženje kod banaka	0,00	0,00%
	Izvori finansiranja (I+II)	4.871.625,21	100,00%

U godišnjem finansijskom izvještaju stranka je iskazala rashode u ukupnom iznosu od 5.109.825,00 KM.

2. PREDSTAVLJANJE POLITIČKE STRANKE

Naziv političke stranke je Socijaldemokratska partija Bosne i Hercegovine. Skraćeni naziv: SDP BiH.

Politička stranka je upisana u registar kod Višeg suda u Sarajevu 21.03.1990. godine, pod brojem upisa: R-I-1/90. Dana 16.03.1999. godine, Socijaldemokratska partija Bosne i Hercegovine je upisana u registar Kantonalnog suda u Sarajevu, pod brojem: R-I-1/99.

Sjedište političke stranke je u Sarajevu, ulica Alipašina 41.

Lica ovlaštena za zastupanje političke stranke su: Nermin Nikšić, predsjednik i Irfan Čengiđ, generalni sekretar stranke.

Lice ovlašteno za podnošenje finansijskih izvještaja za 2014. godinu je Lidija Korać.

Prema podacima iz godišnjeg finansijskog izvještaja za 2014. godinu, organizacionu strukturu Socijaldemokratske partije Bosne i Hercegovine čine:

- Glavni odbor SDPBiH Sarajevo,
- 10 kantonalnih odbora,
- 4 regionalna odbora,

- 2 gradska odbora,
- 97 općinskih/opštinskih odbora,
- Odbor SDP BiH u Brčko distriktu BiH i
- Forum mladih SDP BiH.

3. OPIS REVIZIJE

Predmet revizije je godišnji finansijski izvještaj Socijaldemokratske partije BiH za 2014. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2014. godine i to sljedećih organizacionih dijelova političke stranke:

- Glavnog odbora Socijaldemokratske partije BiH Sarajevo,
- Kantonalnog odbora Socijaldemokratske partije BiH Bihać,
- Kantonalnog odbora Socijaldemokratske partije BiH Goražde,
- Općinskog odbora Socijaldemokratske partije BiH Bihać i
- Općinskog odbora Socijaldemokratske partije BiH Goražde.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je stranka u izvještajnom periodu postupala u skladu sa odredbama Zakona o finansiranju političkih stranaka i članom 15.10 Izbornog zakona BiH.

Obim revizije finansijskih izvještaja Socijaldemokratske partije BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode od imovine, prihode iz budžeta i troškove izborne kampanje.

4. PRETHODNE KONTROLE I REVIZIJE

Služba za reviziju je izvršila pregled i kontrolu godišnjih finansijskih izvještaja Socijaldemokratske partije BiH u periodu od 2004. do 2013. godine, nakon kojih su izdati izvještaji o pregledu i reviziji sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2013. godinu, izdat je izvještaj o pregledu sa mišljenjem revizora, nalazima i preporukama stranci da ne ostvaruje prihode od imovine koja nije u njenom vlasništvu i da vodi tačne evidencije o svojim prihodima i rashodima.

Nerealizovane preporuke:

Na osnovu uočenih nedostataka u godišnjem finansijskom izvještaju za 2014. godinu, utvrđeno je da stranka nije ispoštovala date preporuke.

5. NALAZI I PREPORUKE

5.1. NALAZI

a) Socijaldemokratska partija Bosne i Hercegovine je prekršila odredbe člana 5. stav (4) Zakona o finansiranju političkih stranaka.

(1) Socijaldemokratska partija Bosne i Hercegovine nije u poslovnim knjigama evidentirala nenovčane donacije po osnovu besplatnog korištenja poslovnih prostora, čime je prekršila odredbe člana 5. stav (4) Zakona o finansiranju političkih stranaka.

- Na osnovu akta Općine Bosanska Krupa broj: 01/IV-058/15 od 18.05.2015. godine, utvrđeno je da je Općinski odbor SDP BiH koristio, bez naknade, prostorije u vlasništvu Općine Bosanska Krupa, površine 31,00 m².

- Uvidom u Ugovor o davanju na korištenje poslovne prostorije od 02.10.2013. godine, utvrđeno je da je u izvještajnom periodu Općinski odbor SDP BiH Gradačac koristio, bez naknade, prostorije u vlasništvu Općine Gradačac, površine 56,64 m².
- Prema podacima koje je dostavila Općina Ilijaš, utvrđeno je da je SDP BiH u periodu od 01.01. do 31.12.2014. godine koristila, bez naknade, kancelarijski prostor nad kojim pravo raspolaganja ima Općina Ilijaš, površine 33,8 m².
- Uvidom u Odluku o dodjeli na korištenje poslovnih prostorija bez naknade broj: 02-02-535-3/13-VI od 28.03.2013.godine, utvrđeno je da je Općinski odbor SDP BiH Jablanica koristio poslovni prostor u vlasništvu Općine Jablanica, površine 21,15 m², bez naknade.
- Prema podacima koje je na zahtjev Centralne izborne komisije BiH dostavila Općina Novo Sarajevo, aktom broj: 01-49-1105/15 od 14.05.2015. godine, SDP BiH je koristila prostor površine 102,20 m² u vlasništvu Općine Novo Sarajevo, bez plaćanja naknade.

Socijaldemokratska partija Bosne i Hercegovine je korištenjem poslovnih prostora u vlasništvu općina, bez plaćanja zakupnine, primila nenovčane donacije, koje je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2014. godinu.

- (2) Uvidom u finansijsku dokumentaciju utvrđeno je da stranka nije prijavila prilog fizičkog lica u iznosu od 100,00 KM, čime je prekršila odredbe člana 5. stav (4) Zakona o finansiranju političkih stranaka i člana 14. Pravilnika o godišnjim finansijskim izvještajima političkih stranaka - u daljem tekstu: Pravilnik. Ovo fizičko lice je navedeni iznos sredstava uplatilo u svrhu plaćanja računa za telefon, a što je stranka imala obavezu iskazati u finansijskom izvještaju kao prilog fizičkog lica.

Stranka, takođe, nije izdala potvrdu o primljenom prilogu u skladu sa odredbama člana 6. Pravilnika.

b) Socijaldemokratska partija Bosne i Hercegovine je prekršila odredbe člana 6. stav (2) Zakona o finansiranju političkih stranaka.

Uvidom u finansijsku dokumentaciju Kantonalnog odbora Bihać, utvrđeno je da je prilog fizičkog lica u iznosu od 250,00 KM umjesto na transakcijski račun Glavnog odbora Socijaldemokratske partije BiH uplaćen na transakcijski račun Kantonalnog odbora, što je suprotno odredbama člana 6. stav (2) Zakona o finansiranju političkih stranaka.

c) Socijaldemokratska partija Bosne i Hercegovine je prekršila odredbe člana 8. stav (4) Zakona o finansiranju političkih stranaka.¹

Na osnovu obavljene revizije finansijskih izvještaja, utvrđeno je da je Socijaldemokratska partija Bosne i Hercegovine primila priloge pravnih lica koja su sklopila ugovore o javnim nabavkama radova i roba sa organima izvršne vlasti na svim nivoima u Bosni i Hercegovini čija je vrijednost veća od 10.000,00 KM, u ukupnom iznosu od 10.700,00 KM, čime je prekršila odredbe člana 8. stav (4) Zakona o finansiranju političkih stranaka.

- Glavni odbor stranke primio je prilog pravnog lica „AS“ d.o.o Jelah –Tešanj u iznosu od 7.000,00 KM. Ovo pravno lice je sa Službom za zajedničke poslove institucija Bosne i

¹ Privatna preduzeća koja su sa organima izvršne vlasti na svim nivoima u BiH sklopila ugovor o javnoj nabavci usluga, ugovor o javnoj nabavci robe ili ugovor o javnoj nabavci radova u skladu sa propisima o javnim nabavkama u BiH ne mogu finansijski pomagati političke partije ako vrijednost ugovora u jednoj kalendarskoj godini prelazi iznos od 10.000,00 KM (deset hiljada konvertibilnih maraka).

Hercegovine tokom 2014. godine imalo sklopljen Okvirni sporazum za nabavku kafe i toplih napitaka, broj: 01-16-11-1617-72/14 od 11.12.2014. godine, u vrijednosti od 131.902,60 KM.

- Općinski odbor SDP BiH Lukavac primio je prilog pravnog lica „Junuzović-kopex“ d.o.o. Lukavac u iznosu od 1.000,00 KM. Služba za reviziju je utvrdila da je ovo pravno lice tokom 2014. godine imalo sklopljen ugovor sa Ministarstvom unutrašnjih poslova Tuzlanskog kantona.²
- Općinski odbor SDP BiH Gračanica primio je prilog pravnog lica „Plastex“ d.o.o Gračanica u iznosu od 2.000,00 KM. Na osnovu podataka iz ugovora, utvrđeno je da je pravno lice „Plastex“ d.o.o Gračanica tokom 2014. godine imalo sklopljen ugovor sa Centralnom izbornom komisijom Bosne i Hercegovine.³
- Općinski odbor SDP BiH Tešanj je tokom 2014. godine primio prilog pravnog lica „Doboj-putevi“ d.d Doboj Jug u iznosu od 500,00 KM. Služba za reviziju je utvrdila da je ovo pravno lice tokom 2014. godine sklopilo ugovor o izvođenju radova sa Odjeljenjem za javne poslove Brčko Distrikta BiH, ugovore o sanaciji lokalnih cesta sa Općinom Doboj Jug i ugovore o rekonstrukciji lokalnih puteva sa Opštinom Derвента.
- Socijaldemokratska partija BiH, odnosno Općinski odbor Brčko je primio prilog pravnog lica DOO „Conram“ Brčko u iznosu od 200,00 KM. Prema podacima koje je dostavila Direkcije za finansije Brčko distrikta BiH, pravno lice DOO „Conram“ Brčko je tokom 2014. godine davalo usluge Vladi Brčko distrikta BiH.

d) Socijaldemokratska partija Bosne i Hercegovine je ostvarila prihod od imovine koja nije u njenom vlasništvu, čime je prekršila je odredbe člana 8. stav (5) Zakona o finansiranju političkih stranka.

Na osnovu obavljene revizije finansijskih izvještaja, utvrđeno je da je Socijaldemokratska partija Bosne i Hercegovine izdavanjem imovine u Zenici, Varešu i Gračanici za koje nije dokazala da posjeduje pravo vlasništva u 2014. godini, ostvarila prihod u iznosu od 33.988,92 KM, čime je prekršila odredbe člana 8. stav (5) Zakona o finansiranju političkih stranka.⁴

- Socijaldemokratska partija Bosne i Hercegovine je u 2014. godini od izdavanja pod zakup poslovnih prostorija u Zenici, Ulica Masarikova broj 48, koje nisu u njenom vlasništvu, ostvarila prihod u iznosu od 29.712,00 KM.⁵
- Stranka je izdavanjem poslovnog prostora u Varešu, Ulica Zvijezda broj 14, za koji ne posjeduje relevantne dokaze o vlasništvu⁶, ostvarila prihode u iznosu od 3.076,92 KM.⁷
- Revizijom je, takođe, utvrđeno da je SDP BiH izdavanjem poslovnih prostora u Gračanici, za koji ne posjeduje relevantne dokaze o vlasništvu⁸, ostvarila prihode u iznosu od 1.200,00 KM.⁹

² Ugovor MUP TK i „Junuzović-kopex“ d.o.o. Lukavac broj: 01-147-1956/14 od 21.02.2014.godine, o isporuci goriva u vrijednosti od 64.050,00 KM.

³ Kupoprodajni ugovor zaključen između „Plastex“ d.o.o. Gračanica i Centralne izborne komisije BIH, broj: 07-2-16-3-190-66/14 od 13.06.2014. godine. Vrijednost ugovora 115.411,66 KM.

⁴ U skladu sa odredbom člana 8. stav (5) Zakona o finansiranju političkih partija, političke partije ne mogu ostvarivati prihode od imovine koja nije u njihovom vlasništvu.

⁵ Poslovni prostori u Zenici su izdati sljedećim pravnim i fizičkim licima: SUR Restoran „Dubrovnik“ Zenica (vl. Dervišević Ferid), „Dinel“ d.o.o. Zenica i Advokat Dalibor Tikvina.

⁶ Dokumentacija o vlasništvu nad prostorijama, koju je SDP BiH dostavila Centralnoj izornoj komisiji Bosne i Hercegovine (kopija Katastarskog plana KO Vareš izdata od Općinske geodetske uprave Vareš dana 19.05.2005. godine), je nepotpuna i ne može se sa sigurnošću utvrditi da li na nepokretnostima SDP BiH ima pravo svojine (Mišljenja Sektora za prave poslove i provedbu zakona o sukobu interesa, Odsjeka za pravne poslove, u Centralnoj izornoj komisiji BiH, broj: Sl. 05-1-78/12 od 04.06.2012. godine).

⁷ Poslovni prostor je iznajmljen pravnom licu PTP „MPM“ Vareš. Stranka je ugovor raskinula dana 31.01.2015. godine (obavijest broj:05-17-1370/14 od 29.12.2014. godine).

e) Stranka je prekršila odredbe člana 11. i člana 12. stav (1) i (3) Zakona o finansiranju političkih stranaka.

Uvidom u poslovne knjige stranke utvrđeno je da stranka nije evidentirala sve prihode i troškove u svojim poslovnim knjigama te da godišnji finansijski izvještaj nije popunila u skladu sa Pravilnikom, čime je prekršila odredbe člana 11. i člana 12. stav (1) i (3) Zakona o finansiranju političkih stranaka.

- (1) Revizijom je utvrđeno da stranka u godišnjem finansijskom izvještaju i poslovnim knjigama nije pravilno iskazala ostale prihode, čime je prekršila odredbe člana 13. stav (4) Pravilnika.

Stranka je u finansijskom izvještaju iskazala ostale prihode u iznosu od 24.799,00 KM, od čega prihod Glavnog odbora SDP BiH od prodaje vozila 22.000,00 KM. Revizijom finansijskog izvještaja, utvrđeno je da stranka nije vodila pomoćnu knjigu osnovnih sredstava, tj. da nema evidencije o pojedinačnim vrijednostima osnovnih sredstava, pa tako ni knjigovodstvenu vrijednost prodatog vozila.

Prilikom prodaje vozila, stranka je ukupnu prodajnu vrijednost vozila iskazala kao prihod od prodaje, što je suprotno računovodstvenim propisima i za rezultat ima neosnovano uvećane ostale prihode stranke.

- (2) Stranka u poslovnim knjigama nije pravilno evidentirala prihode iz budžeta i nije pravilno popunila finansijski izvještaj, odnosno obrasce 3-f (prihodi iz budžeta) i 3 (izvori finansiranja), čime je prekršila odredbe člana 19. i člana 13. Pravilnika.

- U poslovnim knjigama i finansijskom izvještaju koji je podnijela Centralnoj izbornoj komisiji Bosne i Hercegovine, politička stranka nije iskazala prihode iz budžeta Opštine Brod u iznosu od 1.230,00 KM.

Na Zahtjev Centralne izborne komisije Bosne i Hercegovine, Opština Brod je dostavila pregled uplaćenih sredstva SDP BiH za period od 01.01. do 31.12.2014. godine iz čega je utvrđeno da su sredstva u ukupnom iznosu od 1.230,00 KM uplaćena na transakcioni račun Općinskog odbora Brod, broj: 5520270001461888 kod Hypo Alpe Adria bank.

- Socijaldemokratska partija BiH je na obrascu 3-f finansijskog izvještaja za Općinski odbor Velika Kladuša iskazala prihode iz budžeta u iznosu od 1.785,70 KM, odnosno manje prihode za 5.357,10 KM.

Uvidom u podatke koje je dostavila Općina Velika Kladuša, utvrđeno je da su sredstva uplaćena Općinskom odboru SDP BiH Velika Kladuša u iznosu od 7.142,80 KM na transakcioni račun broj: 3385102200182723 kod Unicredit banke.

Stranka je u godišnjem finansijskom izvještaju iskazala prihode Općinskog odbora SDP BiH Goražde od članarine u iznosu od 7.238,69 KM, što je za 516,08 KM više u odnosu na ostvarene. Uvidom u izvode sa transakcijskog računa ovog odbora, utvrđeno je da je stranka ostvarila prihode od članarina u iznosu od 6.722,61 KM, što je trebala iskazati u obrascu 3.

- (3) U obrascu 2 finansijskog izvještaja (Pregled prometa transakcijskih računa političke stranke) stranka je pogrešno iskazala promet ostvaren putem transakcijskih računa Kantonalnog odbora SDP BiH Goražde i Općinskog odbora SDP BiH Bihać, čime je prekršila odredbe člana 11. Pravilnika.

⁸ OO SDP BiH Gračanica dostavila je informaciju broj: 264/15 od 21.12.2015. godine, kojom obavještava Glavni odbor stranke da imovina kojom raspolaže stranka u Gračanici, nije uknjižena u katastarske i gruntovne knjige, i da je u toku proces rješavanja uknjiženja.

⁹ Poslovni prostor je iznajmljen pravnim licima DD „Jedinstvo“ Gračanica i „Džemik“ d.o.o Gračanica.

- Kontrolom izvoda sa transakcijskog računa Kantonalnog odbora SDP BiH Goražde, utvrđeno je da je promet ulaza iznosio 28.374,20 KM, odnosno promet izlaza 24.648,24 KM. Stranka je, međutim, u obrascu 2 iskazala promet ulaza u iznosu od 27.806,28 KM i promet izlaza u iznosu od 24.080,32 KM.
- Uvidom u izvode sa transakcijskog računa Općinskog odbora SDP BiH Bihać, utvrđeno je da je promet ulaza iznosio 31.727,84 KM i promet izlaza 31.619,58 KM. Stranka je u obrascu 2 iskazala promet ulaza u iznosu od 31.876,80 KM, odnosno promet izlaza u iznosu od 31.768,54 KM.

- (4) Uvidom u poslovne knjige kantonalnih i općinskih odbora čiji su finansijski izvještaji bili predmet revizije, utvrđeno je da stranka nije vodila adekvatne evidencije o svojim rashodima.

Tako je stranka u poslovnim knjigama Kantonalnog odbora i Općinskog odbora Bihać troškove električne energije za mjesec novembar i decembar iz 2013. godine evidentirala u iznosima od po 450,05 KM, koliko je i platila, dok račune za decembar mjesec 2014. godine nije evidentirala u svojim poslovnim knjigama.

Takođe je utvrđeno da su računi Kantonalnog i Općinskog odbora Goražde za električnu energiju iz 2013. godine evidentirani u poslovnim knjigama za 2014. godinu, dok računi za mjesec decembar 2014. godine nisu uopšte evidentirani. Na isti način stranka je evidentirala i troškove telefonskih usluga.

- (5) Socijaldemokratska partija Bosne i Hercegovine nije obračunala i platila, a u poslovnim knjigama i finansijskom izvještaju nije iskazala troškove niti obaveze po osnovu poreza i doprinosa na sredstva Kantonalnog i Općinskog odbora Bihać isplaćena fizičkim licima u ukupnom iznosu iznosu od 11.036,50 KM, a koja imaju karakter ličnih primanja.

Kontrolom je utvrđeno de je stranka račune za gorivo plaćala putem blagajne i u poslovnim knjigama evidentirala kao naknade za upotrebu sopstvenog automobila.

Obzirom da je stranka troškove goriva plaćala putem blagajne fizičkim licima, te da u svojim poslovnim knjigama za navedene odbore nema evidentirana transportna sredstva odnosno vlasiti automobil, navedene isplate imaju karakter ličnih primanja na koje je stranka u skladu sa poreznim propisima,¹⁰ bila obavezna izvršiti obračun pripadajućih poreza i doprinosa, te po tom osnovu iskazati troškove u poslovnim knjigama i finansijskom izvještaju koji je podnijela Centralnoj izbornoj komisiji BiH.

Troškovi predizborne kampanje

Prema odredbama člana 15.10 Izbornog zakona Bosne i Hercegovine politička stranka za potrebe izborne kampanje ne smije potrošiti više od 0,30 odnosno 0,20 KM¹¹ po biraču u svakom izbornom krugu, prema broju birača koje je objavila Centralna izborna komisija BiH. Prema podacima

¹⁰ Zakon o porezu na dohodak ("Službene novine Federacije BiH", br. 10/08, 9/10, 44/11, 07/13 i 65/13) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11, 20/12, 27/13, 71/13 i 90/13).

¹¹ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

Centralne izborne komisije Bosne i Hercegovine, Socijaldemokratska partija BiH je u svrhu izborne kampanje mogla da potroši 3.353.474,60 KM.

Socijaldemokratska partija BiH u godišnjem finansijskom izvještaju iskazala je troškove izborne kampanje u iznosu 1.361.361,57 KM.

5.2. PREPORUKE

Preporučuje se Socijaldemokratskoj partiji Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da vodi evidencije o primljenim donacijama i da izdaje potvrde o prijemu istih,*
- *da se, u skladu sa članom 6. stav (2) Zakona, dobrovoljni prilozi u novcu uplaćuju na transakcijski račun centrale političke stranke,*
- *da se ne finansira iz izvora koji su zabranjeni ovim Zakonom,*
- *da uspostavi blagovremene, potpune i tačne evidencije o prihodima, rashodima i obavezama stranke,*
- *da troškove evidentira u poslovnim knjigama i iskazuje u finansijskom izvještaju u momentu nastanka obaveze, a ne u momentu plaćanja, odnosno da poslovne knjige vodi u skladu sa Zakonom o računovodstvu i reviziji Federacije BiH, i*
- *da finansijske izvještaje Centralnoj izbornoj komisiji Bosne i Hercegovine podnosi u skladu sa Pravilnikom o godišnjim finansijskim izvještajima političkih stranaka.*

Takođe se preporučuje:

- *da uspostavi i vodi pomoćne evidencije o osnovnim sredstvima, i*
- *da poštuje i druge propise, prevashodno poreske propise, iz kojih proističu dodatne obaveze i troškovi.*

KOMENTAR

U ostavljenom roku, Socijaldemokratska partija Bosne i Hercegovine je dostavila primjedbe na Preliminarni izvještaj o reviziji godišnjeg finansijskog izvještaja za 2014. godinu i postizbornog finansijskog izvještaja-Opći izbori 2014. godine. Služba za reviziju je argumentovane primjedbe stranke uvažila i ugradila u Konačni izvještaj o obavljenoj reviziji.

Zahvaljujemo se ovlaštenom licu za finansijske izvještaje, na korektnoj saradnji tokom obavljanja revizije finansijskih izvještaja.

Šef odsjeka za revizijske poslove

Sanja Tošović

Revizor

Nevenko Andan

Šef Službe za reviziju

mr.sc. Hasida Gušić